

GERMANIA

De Germania clarissima natione & dulcissima patria nostra, multa hic occurrerent scribenda, sed loci angustia cogit nos abbreviare sermonem. Hæc itaq; in superiorem & inferiorē mediante fluuio Mogono, diuiditur. Inferior habet hac nostra ætate Brabantiam, Holandiam, Hassiam, Vuestphaliam, Saxoniam, Frisiam, Pomeraniam, Prussiam, Thuringiam, Misniam &c. Superior uero habet Alsatiam, Heluetiam, Sueuiam, Franconiam, Bauariam, Austriam, Stiriam &c. Inferior eo tempore quo Roma floruit, cultior fuit superiori. Nam scribit Tacitus Germaniam olim fuisse horridam syluis & paludibus infœcundam, frugiferarumq; arborū & omnis culturæ impatientem, id quod nō de tota Germania, sed de ea quam Rhenus & Danubius includunt, dixisse accipiendū est. Obducebatur enim tunc ferē tota Sueuia, inferior Bauaria & Fræconia, Hercynia sylua. Nunc uero tota colitur, adeo ut Hercyniæ syluæ nullę reliquię supersint, præterquā in locis montosis, ut est in Nigra sylua, in Ottonica, Speshartica & Bohemica sylua. Sed nec loca illa, quantumlibet horrendam præ se ferant faciem, carent habitatoribus, ciuitatibus, arcibus, monasterijs & uillis, præsertim cum ex conuallibus insignes undiq; amnes procurrāt, & cuncti in Rhenum & Danubium ruāt, & mirum in modum per eos populus unus alteri ferat opem, adducatq; ea quę apud se abundāt & alibi desiderantur, qualia sunt, ligna ædificijs apta, metalla picearum arborum liquor, casei, butyrum &c. quę ex montosis locis in magna copia in terram planā euehuntur, & pro eis frumētum & uinum reportantur. Quām celebres urbes intra quadringentos annos in superiori & antiqua Germania exortę sint, nemo est qui id ignorat, nisi qui non uidit Nurnbergam, Vlmam, Herbipolim, Bambergam, Vratislauiam, Ambergam, Norlingam, Heltprunnam, Heidelbergam, Stuckgardiam, Thubingam, Friburgū, & alia penē infinita oppida, quę intra Rhenum & Danubium post trāslatum in Germanos imperium sunt extructa. Dicit nequit, quantum ista superior Germania in oppidis, castellis, & uicis, arcibus, monasterijs & pagis creuerit post memoratū tempus, ut uix satis loci fuerit tot Ducibus, Lantgrauis, Margrauis seu Marchionibus, Burggrauis, Palatinis comitibus, Comitibus, Liberis, Baronibus, Nobilibus, Episcopis, Abbatibus & Prepositis, in quos tota Germania, exceptis imperialibus ciuitatibus, quę Imperatorem dominū agnoscunt, est distributa. Multi plebæi sub exactoribus istis duram seruiunt seruitutem. Porro mores & uestitus Germanorum, tam præfectorum quàm subditorum indies mutantur, sanguinarijs militibus semper aliquid noui ex bellis afferētib. Hinc enim increbuit & incruduit, potandi, iurandi, lacerandi uestes, ociandi & ludendi pessima consuetudo. De Sueuis, Bauaris, Franconibus, Alsatis & Rhenēsis, suis quibusque dicetur locis.